

حضرت نُوحِ تَمے بڑا سیلاب

توریت شریف : پیدائش 6 - 11

6

1 جدوں دُنیا اِپر لوک بھوں ہوئے گئے تے اُنہاں

نیاں تیاں جمیاں، 2 اللہ تعالیٰ نے نیک بندیاں

اُنہاں کڑیاں کی تکیا جیہڑیاں بھوں سوہٹیاں سُن۔

تاں اُنہاں اِنہاں کڑیاں وچوں چُٹی کے بیاہ کیتا۔ 3 فر

رب آخیا، ”مہاڑی رُوح ہمیشہ واسطے اِنسان وچ نی

رہن لغی، کیئانکہ او صِرف فانی مخلوق اے۔ ہُن تُوں

بعد او 120 سالان تُوں زیادہ جیئے نی رہن لغے۔“

4 اُنہاں دیہاڑیاں وچ، تے بعد وچ وی، جدوں اللہ

تعالیٰ نے نیک بندے اُنہاں کڑیاں کول گئے تے

اُنہاں کولوں تیاں تے پتر جمے، دُنیا وچ دیو موجود

سُن۔ اے پُرائے زمانے نے مشہور جنگجو سُن۔

5 رب تکیا کہ دُنیا وچ انساناں نے غناہ بھوں ہوئی گئے

اُن، تے اُنہاں نیاں سوچاں تے خیال لگاتار صِرف پہیڑے

ہی اُن۔ 6 او پچھتایا کہ میں اِنسان کی بٹائی کے دُنیا

وچ رخی شوڑیا، تے اُس کی بھوں دکھ ہویا۔ 7 اُس آخیا،

”جہیڑے میں اِنسان بٹائے سُن میں اُنہاں ساریاں کی،

زیمی پر رینگئے آلے تے ٹرنے آلے جانوراں تے پرندیاں

سمیت، ختم کری شوڑساں۔ میں پچھتاؤاں کہ میں
 اُنہاں کی بٹایا سی۔" 8 پر رب حضرت نُوح پر خوش سی۔
 9 حضرت نُوح نا قصہ اے اے۔

حضرت نُوح اِک چنگے تے راستباز بندے سن، تے
 اپٹے زمانے نیاں لوکاں وچ صرف او ہی اِک نیک بندے
 سن۔ او قُربِ اِلمہی وچ رہتے سن۔ 10 حضرت نُوح نے
 تہرے پتر سن، جنہاں نے ناں سام، حام تے یافث سن۔
 11 پر دنیا نے لوک اللہ تعالیٰ نی نظر وچ بگڑے وے سن،
 تے پوری دُنیا ظلم و تشدد نال پہری وی سی۔ 12 جتھے
 وی اللہ تعالیٰ تکٹا سی، دُنیا نے سارے لوک خراب سن،
 کیئانکہ اُنہاں ساریاں اپٹے طور طریقے بگاڑے وے سن۔
 13 اِس واسطے اللہ تعالیٰ حضرت نُوح کی آخیا، "میں
 ساریاں لوکاں کی ختم کرنے نا فیصلہ کیتا، کیئانکہ پوری
 دنیا ظلم و تشدد نال پہرٹ گئی اے۔ میں اُنہاں کی زیمی
 سمیت بلکل تباہ کری شوڑساں۔ 14 پر تُوں آپے واسطے سُرُو
 نی لکڑی نی اِک بڑی کشتی بٹا، تے اُس وچ کوٹھیریاں تیار
 کری کے اُس نے اندر تے باہر تارکول لائی شوڑ۔ 15 اِس

طرح کریاں کہ کشتی نی لمبائی 450 فٹ، چوڑائی 75
 فٹ، ترے اُس نی اُنچائی 45 فٹ رخیان۔ 16 کشتی نی
 چھت اِس طرح بٹایاں کہ اُس نے تھلے ڈیڈ فٹ نا گلہ
 ہووے۔ ترے کشتی نے اِک پاسے دروازہ رخیان، ترے اُس
 نیاں تھرے منزلاں بٹایاں۔ 17 میں اِتنا بڑا سیلاب پیہجساں
 کہ او زیمی نے سارے جانداراں کی ماری شوڑسی۔ زیمی
 پر سب کج فنا ہوئی جاسی۔ 18 پر میں تہاڑے نال مہاڑا
 عہد قائم کرساں۔ اِس واسطے تُوں کشتی وچ بہی جا، ترے
 تہاڑے نال تہاڑی زنائی، تہاڑے پتر ترے اُنہاں نیاں زنائیاں
 وی ہون۔ 19 فر تُوں جانوراں نی ہر قسم نا اِک اِک جوڑا
 اپڑے نال کشتی وچ رخیان، تاکہ او تہاڑے نال جیڑے رہن۔
 20 ہر قسم نے پرندے، زیمی پر ٹرنے ترے رینگٹے آلے جانور
 جوڑیاں وچ تہاڑے کول اچھسٹ تاکہ او وی جیڑے رہن۔
 21 ترے ہر قسم نیاں کھائے نیاں چیزاں وی آپے کول رخی
 کہن، تاکہ اے تُساں ترے جانوراں نے کھائے واسطے ہون۔“
 22 جس طرح اللہ تعالیٰ آخیا، سب
 کج حضرت نُوح اُسے طرح ہی کیتا۔

7¹ فِر رب حضرت نُوح کی آخیا، ”تُوں اپٹے سارے خاندانے سمیت کشتی وچ بھی جا، کیئانکہ تُوں ہی مکی اِس زمانے نیاں لوکاں وچ اِک راستباز نظر آیا ایں۔

2 ساریاں حلال جانوراں وچوں ست ست نر تے اُنہاں نیاں مادیاں، تے جیہڑے حلال نی، اُنہاں وچوں دو دو نر تے مادیاں، کشتی وچ کہنی آ۔³ تے پرندیاں وچوں وی ست ست نر تے مادیاں اُن، تانکہ زیمی اپر اُنہاں نی نسل باقی رہے۔⁴ ستاں دیہاڑیاں تُوں بعد میں چالیاں دیہاڑیاں تے چالیاں راتاں تک بارش برسساں، تے ہر جاندار کی میں زیمی تُوں مُکاساں جیہڑے میں پیدا کتے اُن۔“

5 فِر حضرت نُوح او سارے کم کیتے جنہاں نا حکم رب اُنہاں کی دتا سی۔

6 حضرت نُوح اُس ویلے چھ سو سالان نے سن جڈوں سیلاب آیا سی۔⁷ او تے اُنہاں نی زناٹی، تے اُنہاں نے پتر، تے پتراں نیاں زناٹیاں پاٹی کولوں بچٹے واسطے کشتی وچ بھی گئے۔⁸ حلال تے حرام جانوراں نے جوڑے، پرندیاں تے رینگنے آلیاں جانوراں نے جوڑے

وی،⁹ مطلب نر ترے مادہ، حضرت نُوح کول اچھی کرے
کشتی وچ بہی گئے، جس طرح اللہ تعالیٰ حضرت
نُوح کی حکم دتا سی۔¹⁰ ستان دیہاڑیاں تُوں بعد
اس طرح ہویا کہ سیلاب نا پاٹی زیمی پر آئی گیا۔
¹¹ اے سب کج اُس ویلے ہویا جدوں حضرت نُوح
600 سالان نرے سن۔ دُوئے مہیٹے نرے ¹⁷وین دیہاڑے
زیمی نیاں گہرائیاں وچوں سارے چشمے پھٹی پئے،
تے آسمانے پر وی پاٹی نرے در کھلی گئے۔¹² تے
چالی دیہاڑے تے چالی راتاں زیمی پر بدل برہنا ریا۔
¹³ اُسے دیہاڑے حضرت نُوح تے اُنہاں نی زناٹی، تے
اُنہاں نرے پتر سام، حام تے یافث، تے اُنہاں نیاں پتراں
نیاں زناٹیاں کشتی وچ بہی گئے۔¹⁴ ہر قسم نرے جنگلی
جانور، ہر قسم نرے مال ڈنگر، ہر قسم نرے زیمی پر
رینگنے آلے جانور، تے ہر قسم نرے پرندے سارے اُنہاں
نال سن۔¹⁵ ساریاں جانداراں وچوں دو دو حضرت نُوح
کول اچھی کرے کشتی وچ بہی گئے۔¹⁶ اے سب کج

اس طرح ہویا جس طرح اللہ تعالیٰ حضرت نُوح کی
حُکم دتا سی۔ فِر رب کشتی نا بُوا بند کری شوڑیا۔

17 چالیاں دیہاڑیاں تک سیلاب نا پاٹی زیادہ ہوٹا ریا۔ پاٹی
کشتی کی زیمی تُوں اتنا اُپر چائی کہندا کہ کشتی تَرُن
لغی پئی۔ 18 پاٹی چڑھنا ہی ریا، تے بہوں زیادہ ہوئی گیا۔
تے کشتی پاٹی اُپر تَرنی ہی رہی۔ 19 زیمی پر بہوں ہی زیادہ
پاٹی سی، تے دُنیا پر جیہڑے سارے اُچے اُچے پہاڑ سُن
ڈبی گئے۔ 20 پاٹی اُنہاں کولوں 20 فُٹ اُچا ہوئی گیا تے
سارے پہاڑ ڈبی گئے۔ 21 سارے جنگلی جانور، پرندے،
مال ڈنگر، رینگنے آلے جانور تے انسان غرق ہوئی گئے۔
22 خُشکی نے سارے جاندار مری گئے۔ 23 اللہ تعالیٰ ہر
جاندار شے جیہڑی زیمی پر سی ختم کری شوڑی۔ انسان
حیوان سارے غرق ہوئے گئے۔ صرف حضرت نُوح، اُنہاں
نا خاندان، تے کشتی وچ اُنہاں نال جانور بچی گئے۔

24 پاٹی زیمی پر ڈیڈھ سو دیہاڑیاں،
یعنی پنج مہینیاں تک ٹکا ریا۔

8¹ اللہ تعالیٰ حضرت نُوحِ تے ساریاں جانوراں
 جیہڑے اُنہاں نال کشتی وچ سٹ، کی پُلہیا
 نی سی۔ اُس زیمی پر اک ہوا چلائی، تے پاٹی کہٹ
 ہون لگا۔² زیمی نیاں گہرائیاں وچوں سارے چشمے تے
 آسماناں پر پاٹی نے در بند کیتے گئے، تے بارش ختم
 ہوئی گئی۔³ بارش شروع ہونے نے ڈیڈھ سو دیہاڑیاں،
 یعنی پنج مہینیاں بعد، پاٹی زیمی توں کہٹیاں کہٹیاں
 تھوڑا ہوئی گیا سی،⁴ تے ستویں مہینے نی ستارویں
 تاریخ، مطلب سیلاب شروع ہونے توں پورے پنج مہینے
 بعد، کشتی اراراط نیاں پہاڑاں پر ٹکی گئی۔⁵ پاٹی
 کہٹنا ریا، تے ٹہائی مہینے توں بعد، یعنی دسویں
 مہینے نے پہلے دیہاڑے، پہاڑاں نیاں چوٹیاں نظر آیاں۔
⁶ ہور چالیاں دیہاڑیاں توں بعد حضرت نُوحِ ،
 جیہڑی کشتی وچ کھڑکی بٹائی سی، اُس کی
 کھولی کے⁷ آپے کولوں اک کاں اڈاریا۔ تے جدوں
 تک پاٹی زیمی پر سُکیا نی سی، کاں اڈرنا ریا۔

⁸ اُس تُوں بعد حضرت نُوح آپے کولوں اِک کُہگی
اُڈاری، تانکہ پتہ لغے کہ زیمی تُوں پاٹی کہٹیا اے کہ
نی۔ ⁹ پر کُہگی کی اپٹے پنجرے ٹیکٹے نی جغہ نی لبھی،
کیئانکہ ساری زیمی پر پاٹی پھیلیا واسی۔ اِس واسطے
او حضرت نُوح کول مڑی کے آئی گئی۔ اُنہاں اپٹا ہتھ
اگرے کری کے کُہگی کی پکڑیا تے اندر کہنی گئے۔
¹⁰ ہور ست دیہاڑے ٹھہری کے اُنہاں فر کُہگی
کشتی وچوں اُڈاری۔ ¹¹ نماشاں ویلے کُہگی اُنہاں
کول مڑی آئی، تے اُنہاں تکیا کہ زیتون نا اِک
تازا پتر اُس نی چُونجرے وچ اے۔ فر اِس طرح
اُنہاں کی پتہ لغا کہ پاٹی تھوڑا ہوئی گیا اے۔
¹² اُنہاں ہور ست دیہاڑے صبر کیتا تے فر کُہگی
کی اُڈاریا، پر اِس دفعہ او اُنہاں کول مڑی کے نی آئی۔
¹³ حضرت نُوح نی عمر نے 601 سال نے پہلے مہینے
نی پہلی تاریخ تک پاٹی زیمی پر سُکی گیا سی۔
فر حضرت نُوح کشتی نی چھت کھولی کے تکیا

کہ زیمی نی سطح سُکی گئی اے۔ ¹⁴ دُوئے مہینے
 نی ستائی تاریخ تک زیمی بالکل سُکی گئی سی۔
¹⁵ فِر اللہ تعالیٰ حضرت نُوح کی آخیا، ¹⁶ ”اپٹی
 زنائی، اپٹے پتر، تے اُنہاں نیاں زنائیاں سمیت کشتی
 وچوں باہر نکلی آ۔ ¹⁷ ساریاں پرندیاں، جانوراں تے
 رینگنے آلیاں جانوراں کی وی باہر کہنی آ جیہڑے
 تہاڑے نال اٹ، تاکہ او زیمی پر رہن تے پھلن پھولن۔“
¹⁸ فِر حضرت نُوح اپٹی زنائی، اپٹے پتراں تے اُنہاں نیاں
 زنائیاں کی نال کہنی کے باہر نکلی آئے۔ ¹⁹ سارے
 جانور، رینگنے آلے جانور، تے پرندے اپٹی اپٹی
 قسماں نیاں ٹولیاں وچ کشتی تُوں باہر نکلی آئے۔
²⁰ فِر حضرت نُوح رب واسطے اک قربانی دیتے آلی
 جغہ بٹائی، تے حلال جانوراں تے پرندیاں وچوں کُج
 کُج کہنی کے رب اگے قربانی دیئی کے پوری طرح
 ساڑی شوڑیا۔ ²¹ رب قربانیاں نی خوشبو تُوں خوش ہویا،
 تے اپٹے دلے وچ آخیا، ”ہُن میں انساناں نی وجہ نال
 کدے وی زیمی پر لعنت ناں پہیجٹ لگا، حالانکہ

انساناں نا دلِ نِکی عمر تُوں ہی خراب اے۔ تے ساریاں جانداراں کی جس طرح میں ہُن ماریا، کدے نا مارن لگا۔²² جدوں تک زیمی رسی تے رائی بائی، کٹائی نا ویلا، گرمی تے سردی، دیہاڑ رات ختم نی ہون لگی۔“

9 ¹ فِر اللہ تعالیٰ حضرت نُوح کی تے اُنہاں نیاں پتران کی برکت دتی تے آخیا، ”تُساں پھلو پھولو، بدھو تے زیمی پہرو۔² سارے جانور، پرندے، زیمی پر رینگنے آلے جانور تے مچھلیاں تُساں کولوں ڈری کرے ریسن۔ میں اِنہاں ساریاں کی تُساں نے قابو وچ دیئی شوڑیا اے۔³ جس طرح میں تُساں نے کھائے واسطے پودیاں نی پیداوار مقرر کیتی، اِسے طرح ہُن تُوں تُساں کی ہر قسم نے جانور کھائے نی اجازت وی اے۔⁴ پر گوشت کی نہ کھاؤ جدوں تک اُس نا سارا خون نکلی نہ جائے۔⁵ کُسے نی جان کیننا منع اے۔ جیہڑا اِس طرح کرسی اُس کی اپنی جان دیٹی پسی، پاوین او انسان ہووے یا حیوان۔ میں آپوں اِس نا مُطالبہ کرساں۔⁶ جیہڑا

بندہ خون کرسی، اُس نا خون وی ضرور بندیاں کولوں
ہوسی، کیئانکہ اللہ تعالیٰ انسان کی اپٹے ار بٹایا۔

7 پر تُساں پھلو پھولو تے خوب بدھو، زیمی

اپر اپٹی نسل بدھاؤ، تے بہوں ہوئی جاؤ۔“

8 فر اللہ تعالیٰ حضرت نُوح کی تے اُنہاں نے پتراں کی

آخیا، 9 ”تکو، ہُن میں تُساں نال تے تُساں نی نسلان

نال مہاڑا عہد قائم کرنا آں۔ 10 اے عہد اُنہاں ساریاں

جانوراں نے نال وی ہوسی جیہڑے تُساں نال کشتی

وچوں نکلے، یعنی پرندے، مال ڈنگر تے سارے جنگلی

جانور۔ 11 میں تُساں ساریاں نال مہاڑا عہد قائم کرنا آں کہ

سارے جاندار سیلاب نے پاٹی نال کدے نہ مرسن، تے

نہ ہی کدے سیلاب زیمی پر تباہ کرنے واسطے اچھسی۔

12 اِس ابدی عہد نا نشان جیہڑا میں تہاڑے تے سارے

جانوراں نال قائم کرنا پیاں، اے اے کہ 13 میں بدلاں وچ

قوسِ قرع رخٹا آں۔ اے زمینے نال مہاڑے عہد نا نشان

ہوسی۔ 14 اِس طرح ہوسی کہ جس ویلے میں زیمی پر بدل

اُتساں تے او قوسِ قرع چہڑے وچ نظر اچھسی، 15 فر میں

اپنے عہد کی جیہڑا میں اپنے تے ساریاں جانداراں سمیت
 تُساں نال کیتا، اے یاد کرساں تے ساریاں جانداراں کی
 مارنے واسطے سیلاب کدے نہ اُتساں۔¹⁶ جدوں او قوسِ
 قزح چہڑے وچ اچھسی، تے میں اس کی تکی کے اپنا
 ابدی وعدہ یاد کرساں جیہڑا مہاڑے تے ساریاں جانداراں
 سمیت تُساں نال ہویا اے۔¹⁷ اے اُس عہد نا نشان
 اے جیہڑا میں دنیا نے سارے جانداراں نال کیتا اے۔“
¹⁸ حضرت نُوح نے پتر، جیہڑے کشتی وچوں
 نکلے، او سام، حام تے یافث سُن۔ (حام کنعان
 نا پیؤ سی۔)¹⁹ اے تہرے حضرت نُوح نے
 پتر سُن جنہاں نی نسل زیمی پر پھیلی گئی۔
²⁰ فر حضرت نُوح زمینداری کرن لغمے تے اُنہاں اک
 انگوراں نا باغ لایا۔²¹ اک دیہاڑے او اُس باغے نیاں
 پھلاں نی شراب پی کے نشے وچ آئی گئے، تے اپنے
 تمبو وچ ننگے ہوئی کے لمے پئی گئے۔²² فر حام، جیہڑا
 کنعان نا پیؤ سی، اپنے پیؤ کی ننگا تکیا، تے باہر اچھی
 کے اپنے دوئاں پہراواں کی دسیا۔²³ فر سام تے یافث اک

کپڑا کھندا، تے اپڑے مونڈیاں پر رخی کے پچھکنڈیوں
 اپڑے پیو نا ننگا جسم ٹہکی شوڑیا۔ اُنہاں نے مُونہ پُٹھے
 پاسے سن، اِس واسطے اُنہاں اپڑے پیو کی ننگا نی تکیا۔
 24 جدوں حضرت نُوح نا نشہ لہی گیا تے او ہوشے
 وچ آئے، اُنہاں کی پتہ لگا کہ اُنہاں نے ساریاں تُوں
 نِکے پُترے اُنہاں نال کے کیتا۔ 25 فِر اُنہاں آخیا،
 ”کنعان پر لعنت ہووے!

او اپٹیاں پہراواں نے غلاماں نا غلام ہوسی۔
 26 مبارک ہووے رب، جیہڑا سام نا خدا اے!
 کنعان سام نا غلام ہووے۔
 27 اللہ کرے کہ یافث نیاں حداں بدی جان۔
 تے اُس نی اولاد سام نے لوکاں نال رہے،
 تے کنعان یافث نا غلام ہووے۔“
 28 سیلاب تُوں بعد حضرت نُوح ساڈے تہرے
 سو سال ہور جیٹے رہے۔ 29 فِر او ساڈے
 نو سو سالان نے ہوئی کے فوت ہوئے۔

10

1 اے حضرت نُوح نے پُتراں سام،
حام ترے یافت نا شجرہ نسب

اے۔ انہاں نے پُتر سیلاب تُوں بعد پیدا ہوئے۔

2 حضرت یافت نے پتر جُومر، ماجُوج،

مادائی، یاوان، تُوبل، ماشک ترے تیراس سن۔

3 جُومر نے پتر اشکناز، رِیفات ترے تُوجرمہ سن۔

4 یاوان نے پتر اَلِیشہ، ترسیس، کتیم ترے رُودانیم

سن۔ 5 او انہاں قوماں نے آبا و اجداد سن جیہڑے

ساحلی علاقیاں ترے جزیریاں وِچ پھیلی گئے۔ اے

لوک اِٹے اِٹے مُلخے، اِٹے اِٹے گراواں، اِٹے اِٹے

قبیلے، ترے اِٹے اِٹے بولی نے مطابق آباد سن۔

6 حام نے پتر کُوش، مصر، فُوط ترے کنعان سن۔

7 کُوش نے پتر حویلہ، سبتہ، رعما ترے سبتکہ سن۔

رعما نے پتر شبا ترے ددان سن۔

8 کُوش کولوں نمرُود جمیا، جیہڑا ساری زیمی پر اک

عظیم بادشاہ بٹی گیا۔ 9 او رب نے سامنے اک عظیم

شکاری بٹیا، ترے اس واسطے اج وی کِسے اچھے شکاری

نے بارے وچ اے مثال دتی جاٹی اے کہ ”او نمروڈ
 نی طرح رب نی نظراں وچ اک عظیم شکاری اے۔“
 10 نمروڈ نی بادشاہی سنعار نے ملخے وچ بابل، ارک تے
 اکاد نے شہراں توں شروع ہوئی سی۔ 11 فر اُس ملخے
 وچوں نکلی کے او ملک اسور وچ آئے، تے اٹھے نینوہ،
 رخبوت عیر، گلح تے 12 رسن بسائے۔ رسن او شہر اے
 جیہڑا نینوہ تے بڑے شہر کلح نے بشکارے وچ اے۔
 13 فر مصر انہاں قوماں نا پیؤ بٹیا: لودی،
 عنامی، لہابی، نفتوحی، 14 فتروسی، کسلوچی
 تے کفتوری۔ (کسلوچیاں کولوں فلستی نکلے۔)
 15 گنعان نا پہلا پتر صیدون سی۔ فر او انہاں قوماں
 نا پیؤ بٹیا: حتی، 16 ییوسی، اموری، جرجاسی،
 17 جوی، عرقی، سینی، 18 اروادی، ضیماری تے حماتی۔
 بعد وچ کنعانیاں نے قبیلے اتنے پھیلی گئے 19 کہ
 انہاں نیاں حداں شمال وچ صیدون شہر توں جنوب
 آلے پاسے جرار شہر آلی طرفوں غزہ شہر تک،

تے اُتھوں مشرق نے پاسے سدُوم، عمُورہ، ادمہ تے
ضِبُوئیم شہراں آلی طرفوں لَسَع شہر تک سُن۔

20 حام نے پُتر اے اُن جیہڑے اِٹھے اِٹھے

مُلخے، اِٹھے اِٹھے گراواں، اِٹھے اِٹھے قبیلے،
تے اِٹھی اِٹھی بولی نے مطابق آباد سُن۔

21 سام جیہڑا یافتّ نا بڑا پہرا سی، اُس نے پتر
جمے۔ سام ساری بنی عبر نا پیوُ دادا وی بٹی گیا۔

22 سام نے پُتر اے سُن: عیلام،

اِسور، ارفکسد، لُود تے ارام۔

23 ارام نے پتر اے سُن: عُوض، حُول، جَتر تے مَسک۔

24 ارفکسد کولوں شلح جمیا، تے شلح کولوں عبر جمیا۔

25 عابر کولوں دو پتر جمے۔ اِک نا ناں فلج سی،

یعنی پھیلیا ہویا، کیئانکہ دُنیا نے لوک اُس ویلے

پھیلی گئے سُن۔ دُوئے پہراؤ نا ناں یقطان سی۔

26 یقطان کولوں الموداد، شالف، حضرَموت،

یارح، 27 ہدُورام، اوزال، دِقْلہ، 28 عُوبال، ابی

مائیل، شیبیا، 29 اُوفیر، حَویلہ تے یُوباب جمے۔

اے سارے یقطان نے پتر سن۔³⁰ انہاں نی آبادی
میشع تون سفار نے پاسے مشرقی پہاڑاں تک سی۔

³¹ اے سام نے پتر ان جیہڑے اپٹے اپٹے
مُلخے، اپٹے اپٹے گراواں، اپٹے اپٹے قبیلے،
تے اپٹی اپٹی بولی نے مطابق آباد سن۔

³² اے سارے اپٹیاں اپٹیاں نسلان تے اپٹیاں اپٹیاں قوماں نے
مطابق حضرت نوح نے پتران نے قبیلے ان۔ سیلاب تون بعد
انہاں قبیلیاں تون ساریاں قوماں پوری دُنیا وچ پھیلی گیاں۔

11 ¹ شروع وچ ساریاں لوکاں نی اک
ہی زبان سی۔ ² لوکاں کی مشرق

آلے پاسے جائیاں جائیاں سِنعار نے مُلخے وچ
اک میدان نظر آیا تے انہاں اُتھے اپٹا ڈیرا لایا۔

³ فِر انہاں آپے وچ آخیا، ”اچھو، اساں اٹاں بٹاں،
تے اگی وچ چنگی طرح پکاں۔“ انہاں بٹے نی جغہ
اٹاں، تے مصالحوں نی جغہ تارکول استعمال کیتا۔

⁴ فِر او آخٹ لغے، ”اچھو، اساں اپٹے واسطے شہر
بٹاں، جس وچ ایسے جیا مینار ہووے جیہڑا آسمان

تک پہنچی جائے۔ فراساں نا ناں قائم ہوئی جاسی،
 تے اساں ساری دُنیا اُپر بکھرنے تُوں بچی جاساں۔“
 5 پر رب اُس شہر تے مینار کی تکی کے 6 آخیا،
 ”تکو، اے لوک جیہڑے سارے اک اٹ تے انہاں نی
 زبان وی اک ہی آے، ہُن اے کم کرن لُغے اٹ۔ اِس
 واسطے جو کُج کرنا چائے اٹ، اے انہاں واسطے اوکھا
 نی۔ 7 میں انہاں نی بولی دریم بریم کری شوڑساں،
 تانکہ او اک دُوئے نی گل ناں سمجھی سکن۔“
 8 بس اِس واسطے رب انہاں کی اُتھوں ساری
 زیمی اُپر بکھیری شوڑیا، تے او شہر بناٹے تُوں
 رُکی گئے۔ 9 اِس واسطے شہر نا ناں بابل، مطلب
 پلکھیا ہویا، رخیا گیا، کیئانکہ رب اُتھے دُنیا نیاں
 ساریاں لوکاں نی زبان کی دریم بریم کری کے
 اُنہاں کی اُتھوں ساری زیمی اُپر بکھیری شوڑیا۔
 10 اے سام نا شجرہ نسب اے۔

جدوں او اک سو سالان نا ہویا سی، اُس نا پُتر
 ارفکسد جمیا۔ اے سیلابے کولوں دو سال بعد ہویا۔

11 تے ارفکسد نے جمٹے ٹوں بعد سام 500 سال ہور

زندہ ریا، تے اُس نے ہور تیاہاں تے پُتر جمٹے رہے۔

12 جس ویلے ارفکسد 35 سالان نا سی اُس نا پتر شلح

جمیا۔ 13 تے شلح نے جمٹے ٹوں بعد ارفکسد 403 سال

ہور زندہ ریا، تے اُس نے ہور تیاہاں تے پُتر جمٹے رہے۔

14 شلح جس ویلے تریئاں سالان نا سی اُس نا پتر عبّر

جمیا۔ 15 تے عبّر نے جمٹے ٹوں بعد شلح 403 سال

ہور زندہ ریا، تے اُس نے ہور تیاہاں تے پتر جمٹے رہے۔

16 جس ویلے عبّر 34 سالان نا سی اُس نا پتر فلج

جمیا۔ 17 تے فلج نے جمٹے ٹوں بعد عبّر 430 سال ہور

زندہ ریا، تے اُس نے ہور تیاہاں تے پتر جمٹے رہے۔

18 جدوں فلج تریئاں سالان نا سی اُس نا پتر رعُو

جمیا۔ 19 تے رعُو نے جمٹے ٹوں بعد فلج 209 سال ہور

زندہ ریا، تے اُس نے ہور تیاہاں تے پُتر جمٹے رہے۔

20 جدوں رعُو بتیاں سالان نا سی اُس نا پتر سُرُوج

جمیا۔ 21 تے سُرُوج نے جمٹے ٹوں بعد رعُو 207 سال

ہور زندہ ریا، تے اُس نے ہور تیاہاں تے پتر جمٹے رہے۔

22 جدوں سُرُوج تریئاں سالان نا سی اُس نا پتر نُحور
جمیا۔ 23 تے نُحور نے جمٹے ٹوں بعد سُرُوج 200 سال
ہور زندہ ریا، تے اُس نے ہور تیاہا تے پتر جمٹے رہے۔
24 جدوں نُحور اُنٹیاں سالان نا سی اُس نا پتر تارح
جمیا۔ 25 تے تارح نے جمٹے ٹوں بعد نُحور 119 سال
ہور زندہ ریا، تے اُس نے ہور تیاہا تے پتر جمٹے رہے۔
26 جدوں تارح 70 سالان نا ہوئی گیا اُس ٹوں بعد اُس
نے ترے پتر حضرت ابرام، نُحور تے حاران جمے۔
27 اے تارح نا شجرہ نسب اے۔

تارح نے پتر حضرت ابرام، نُحور تے حاران جمے۔ تے
جناب حاران نے پتر حضرت لوط جمے۔ 28 اپٹے باپ
تارح نی زندگی وچ ہی حاران کسدیاں نے اور شہر وچ
مری گیا، جتھے او پیدا وی ہویا سی۔ 29 تے حضرت ابرام
تے نُحور دواں اپٹا اپٹا بیاہ کری کھندا۔ حضرت ابرام نی
کھرے آلی نا ناں بی بی ساری، تے نُحور نی کھرے
آلی نا ناں بی بی ملکہ سی۔ او ہی ہاران نی تیاہی سی،

تے اُس نی پہیٹوں نا ناں بی بی اِسکھ سی۔³⁰ تے بی بی ساری بانجھ سی، اِس واسطے اُس نے بچے نی سٹ۔
³¹ تارح اپٹے پترے حضرت ابرام کی، تے اپٹے پوترے حضرت لوط کی جیہڑے جناب ہاران نے پتر سٹ،
 تے اپٹی نوں بی بی ساری کی جیہڑی اُنہاں نے پترے حضرت ابرام نی کھرے آلی سی، نال کیندا، تے
 اے سارے کلدانیاں نے شہر اُر وچوں نکلی کے
 مُلخ کنعان در تُری گئے۔ جِسلے او شہر ہاران تک
 پُہچے، تے اُتھے رہن لغی پئے۔³² تارح دو سو پنج
 سالان نی عمر نے ہوئی کے شہر ہاران وچ مری گئے۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر
کیتا۔ اسان نا دلی مقصد اے کہ اس پیغام کی پھیلا یا جائے۔
اسان خوشی نال عیسیٰ المسیح نے بارے وچ تسان نال گل
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>